



Start dil project «Rein & Péz»

Glion, ils 11 d'avrel 2022 – start dil project «Rein & Péz» per sclarir igl access direct al Péz Mundaun cun ina pendiculara naven da Glion.

Gia dapi generaziuns vegn semiau d'in access direct al Péz Mundaun da Glion anora. Il panorama extraordinari fa che quella muntogna ei daventada ina preziada destinaziun d'excursiun. Igl access actual al Péz Mundaun ei restrenschius duront la stad. Perquei duei quei potenzial turistic vegnir nezegiaus meglier pil futur.

Visiun

Carmelia Maissen, presidenta dad Ilanz/Glion, declara: «La finamira da quei project ei d'establi il Péz Mundaun, la muntogna da casa da Glion, sco destinaziun d'excursiun e da cheutras svilupper la regiun entuorn il Mundaun sco destinaziun attractiva duront igl entir onn.» Cun quei project exemplaric vul ins dar impurtonts impuls economics alla regiun ed augmentar las pernottaziuns, la valorisaziun turistica e cheutras la qualitat da viver ton pils indigens sco era pils hosps. Il niev access al Péz Mundaun naven da Glion rinforzescha il marcau en sia rolla da center dalla regiun cun las duas vischnauncas vischinontas Lumnezia e Sursaisa Mundaun. Quei access possibilitescha ina mobilitad sin basa dil traffic public, in basegns che vegn a crescer el futur.

IG Rein & Péz

Per perseguitar quella visiun communabla ei vegnida fundada la cuminonza d'interess "Rein e Péz" cun las treis vischnauncas dad Ilanz/Glion, Lumnezia e Sursaisa Mundaun al tgamun. Vinavon s'engaschan en quella cuminonza las organisaziuns Surselva Turissem SA (STAG), il Svilup regional Surselva, las pendicularas dad Obersaxen Mundaun e la Cuminonza d'interess dil proprietaris da secundas habitaziuns Surselva. Sco emprem eis ei d'elavurar in studi davart la realisabladad da quei project. Quella lavur stat sut la bitgetta dalla Provisio SA cun Claudio Deplazes che ei vegnius incaricaus cun la direcziun operativa dil project. La gruppa da project ei actualmein vidlunder da sclarir las pusseivladads da realisar quella visiun e da skizzar variantas dall'avertura cun ina pendiculara (trassé, sistem dalla pendiculara). Suenter che la realisabladad da variantas pusseivlas ei sclarida, ton ord vesta economica sco dalla planisaziun dil territori, suondan ils contacts e las discussiuns cun autras gruppas d'interess sco organisaziuns per la protecziun digl ambient, vischins e proprietaris da terren pertuccai.

Protecziun digl ambient e durabladad

Carmelia Maissen declara: «La pli preziosa resursa dil turissem en Surselva ei in cumportament en gronda responsabladad envers la natira ch'ei nies spazi da viver. Perquei ei nosssa impurtonta devisa da s'avischinar alla cuntrada cun tut quita ed a moda e maniera persistenta.» Il project «Rein e Péz» duei promover in turissem persistent e la pusseivladad da guder la natira autenticamein. Perquei duei vegnir accordau tutta impurtonza alla tgira e protecziun dalla cuntrada e natira dalla bial'entschatta enneu. Ei descha da schurmegiar biotops, palius e territoris da retratga per nos animals. «Perquei vulein nus realisar quei project en stretga collaboraziun cun las organisaziuns per la protecziun digl ambient e quei gia elavurond las variantas pusseivlas».

Quei project duei era dar gronda peisa all'integrasiun dil traffic public. Quel duei vegnir promovius el senn d'in mied da transport persistent. La colligiazion directa alla viafier possibilitescha era da contonscher viaggiaturas e viaggiaturs dal «Alpine Circle» e dil «Glacier Express», mo era da plidentar novas gruppas en mira els marcaus.

#surselva #pizmun daun #rhein&rauf


Ulteriuras informaziuns:

Informaziuns entuorn il Péz Mundaun ein d'anflar sut:

<https://www.surselva.info/Piz-Mundaun>

Maletgs tier quei text ein disponibels sut :

<https://www.surselva.info/Media/Touren/Panoramawanderung-zwischen-Piz-Mundaun-und-Pez-Sezner>



Survesta Péz Mundaun - ©: Mäsi Volken, Surselva Tourismus AG



Ascensiun al Hitzeggen – ©: Surselva Tourismus AG



Trutg panoramic – ©: Surselva Tourismus AG

Informaziuns

Dr. Carmelia Maissen
Presidenta communal – Gemeindepräsidentin Ilanz/Glion
Piazza Cumin 9
7130 Ilanz
Telefon 081 920 15 15
E-Mail: carmelia.maissen@ilanz-glion.ch